



Мұхтар Әуезов атындағы ОҚУ-ға – 80 жыл!

Биыл еліміздегі іргелі оқу орындарының бірі Мұхтар Әуезов атындағы Оңтүстік Қазақстан университетінің құрылғанына 80 жыл толып отыр. Университет бүгінде терең тарихы қалыптасқан, білікті кадрлардың шеберханасына әрі ғылым ордасына айналған. Мерейтой қарсаңында ҚР Үкіметінің қаулысымен оқу орнына «зерттеу университеті» мәртебесі берілді.

Бұл туралы ҚР Ғылым және жоғары білім министрі Саясат Нұрбек жоғары оқу орнының 80 жылдық мерейтойында хабарлады.

Бүгінгі таңда Auezov University академиялық және ғылыми қызметте тамаша нәтижелер көрсетуде. Соңғы төрт жылда университет ғалымдары химиялық технология, құрылыс, фуд-инжиниринг, био және нанотехнология және т. б. салаларда бес миллиард теңгеден астам гранттық жобалар мен бағдарламаларды орындады.

Мұхтар Әуезов атындағы ОҚУ-ға – 80 жыл!



(Соңы. Басы 1-бетте).

– Сексен жылдық мерейтой біз үшін мерекелік іс-шара ғана емес, сонымен қатар бүгінгі күннің шындығын бағалау мен университеттің даму болашағын терең талдау. Бүгінгі таңда Әуезов университеті стратегиялық серіктестікті қарқынды дамытуда, – деп атап өтті М.Әуезов атындағы ОҚУ ректоры Дария Қожамжарова.

ЖОО арқасында өңірге бір миллиард теңгеден астам сомаға инвестициялар түріндегі коммерцияландыру жүргізілген. Бүгінде Auezov University елімізде өңірлер арасында қуатты студенттік корпусқа ие. Мұнда жиырма сегіз мыңнан астам студент білім алады. «ЖОО үздік оқытушысы» атағының 300 иегері, «Болашақ» халықаралық бағдарламасының 80 түлегі, ғылым саласындағы мемлекеттік сыйлықтың 8 лауреаты бар. «Нобель» сыйлығының лауреаты – Рае Квон Чунг университет студенттеріне дәріс береді.

Қазір университет ұлттық және халықаралық рейтингтерде көшбасшы орынға ие, Азиядағы үздік 150 университеттің қатарына кіріп, 4 QS жұлдызымен марапатталған. Сондай-ақ «Ең жасыл кампус ретінде» Green Metric университеттерінің тұрақтылығы бойынша әлемдік рейтингте көш бастап тұр.

Айта кетейік, ЖОО тарихында 5000-нан астам қорғау құжаттары мен патенттер алынды. Ғылыми және ғылыми-техникалық жобалар мен бағдарламаларды орындауға 350 жетекші шетелдік ғалым тартылды. 80 жыл ішінде университет әлемнің 25 елінде жұмыс істейтін екі жүз қырық мың түлек шығарды.

Оқу орнының 80 жылдық мерейтойы қарсаңында пайдалануға берілген 4 бірдей зертхана университеттің ғылыми әлеуетін одан әрмен нығайтуға тың серпін бермек. «Тамақ биотехнологиясы» зертханасы ауыл

шаруашылығы өнімдері мен шикізаттарды қайта өңдеуге және сақтауға арналған. «Химиялық өндіріс процестері мен аппараттарын модельдеу» зертханасында ғалымдар бастапқы тұжырымдамадан соңғы өнімге дейін инновациялық, үнемді және экологиялық таза шешімдерді әзірлеумен айналысады. «Auezov REILEAP leather center» зертханасының басты мақсаты сол – докторанттар мен магистранттарға тәріні өңдеу, былғарыдан жасалған бұйымдар мен аяқ киім материалдары саласында ғылыми-зерттеулер жүргізуге мүмкіндік береді. «Ауыз суды дайындаудың тиімді технологияларын жасау кешенінде» тіршілік нәрінің қажеттілігінің ғылыми-әдістемелік негіздері жасалып, жер асты суларын тазарту әдістері зерттеледі.

Сонымен қатар, мерейтой қарсаңында университеттің түлегі, Ұлттық ғылым академиясының академигі Мұрат Жұрынов атындағы дәрісхана пайдалануға берілді.

– ҚР Ұлттық Ғылым академиясының академигі Мұрат Жұрынов атындағы аудиторияда шетелдік ғалымдар мен профессорлардың дәрістері, сабақтары, кездесулері өтеді. Мұрат Жұрынұлы Сізге Қазақстан ғылымына қосқан баға жетпес үлесіңіз үшін зор алғысымызды білдіреміз. Қазір сіздің жолыңызды жалғастыратын химиктер, ғалымдар ұрпағы өсіп келеді. Біздің университет ғылыми қызметті дамытуға үлкен күш салуда, – деп атап өтті Auezov University ректоры Дария Қожамжарова.

Мерейтой соңында оқытушылар мен студенттер Құрмет грамоталарымен, мерейтойлық медальдармен және Алғыс хаттармен марапатталды. Қазақстандық өртістердің, музыкалық ұжымдардың және университеттің би ансамбльдерінің қатысуымен гала-концерт қойылды.

Е. ҚОЖАХМЕТҰЛЫ.